


mainatges d'òc **PLUMALHON**

La biodiversitat

Dròlles e dròllas devon caminar mai
d'un quart d'ora per anar quèrre
d'aiga al potz.

Tògo



Lo singlar

Los singlars son presents dins tota Euròpa gaireben, fins a Asia e dins lo nòrd d'Àfrica. En çò nòstre, èran absents de plan regions abans 1900. L'òme los i a introduits per poder caçar.

Los singlars son los cosins salvatges dels nòstres pòrcs domèstges. Pels bòsques de l'Euròpa de l'Èst, los pus gròsses pòdon pesar fins a 300 kg. Aicí, sovent, pesan pas mai de 170 kg.

Los singlars son omnivòrs. De nuèch, a solelh colc o a boca de nuèch, van cercar per s'avidar.

Amb lo morre, modilhan lo sòl per trobar de vèrms, d'agland, de mirguetas, de raices, d'escargòls, de frucha o de camparòls.



Tèxte e fòtos Fred Lavail

Los singlars son de mamifèrs. Las femèlas fan de tres a uèch pichons, los singlarons. Los singlarons tetan la maire tres meses e al cap de sièis meses son autonòmes.

Los singlars vivon en tropa. Pr'aquò qualques mascles pòdon viure sols. Per s'afirmar e per se mesurar, los mascles joves se picanhan e mai se baton, mas sens se far mal.



Los joves se picanhan mas es un jòc.

Es un biais de s'afirmar.

Los singlars son pro discrèts. Òm los pòt decelar a las pesadas caracteristicas que daissan sul sòl.



Dins una nuèch, los singlars pòdon córrer mai de 20 km per cercar per manjar.

Lo jorn, demòran al jaç dins un clòt que fan dins lo sòl. Espèran lo ser e la nuèch per tornar partir a l'aventura.

Los singlars trigòssan tanben de brancas o de socas que rosigan per se limar las dents.

